

晚

晴

移

詩

匯

晚晴簃詩匯卷九十一目錄

姚鼐 四十八首

褚廷璋 十一首

董潮 五首

祝德麟 七首

李鐸 一首

曹焜 三首

李調元 四首

袁樹 九首

王嵩高 九首

張九鉞 十首

晚晴移詩匯卷九十一

徐世昌

姚鼐字姬傳一字夢穀桐城人乾隆癸未進士改庶吉士授禮部主事歷官刑部郎中重宴鹿鳴加四品銜有惜抱軒集

詩話惜抱以古文鳴一世倡爲義理考據詞章闕一不可之說後之言古文者咸宗之作詩亦用古文之法七律勁氣盤折獨創一格曾文正吳攀甫皆效其體奉爲圭臬七古尤晶瑩華貴晚年雖學玉局而不失唐人格韻非開齋船山輩所能及也

錢舜舉蕭翼賺蘭亭圖

萬壑千巖當坐起斷取越東山百里世間不見永和人長有春風流曲水滄海日高開寺樓樓上當窗僧白頭越僧世得鍾張法頭白朝朝摹禊帖扣門客坐軒檻風茶香酒

喚笑語同致君有道堯舜出訪古無人義獻空頻說法書
日西宴蕭郎縮手心無限老僧抵掌僧雖睨似謂慢藏旁
欲諫語卿且勿諫懷璧不可居御史稱有詔明日將登車
長安再拜陳玉除歐虞俯首愧不如年往運謝五百餘錢
生染筆中躊躇石牀閉絕昭陵夜無復人間第一書

山寺

四山動秋響高林黯將夕披雲度寒榛暮陰下前壁寺門
風蕭蕭飛葉滿巖積箐嶼暗深溪淙鳴出穹石想見谷口
外落日遠峯碧一磬流煙中萬壑抱檐隙豈無湛冥人於
茲衣蘿薜初月輝易盡悵望遂停策

贈郭昆甫煖助教

老儒閉門元尙白牢邪石邪五鹿客寄生入盆爲甕藪衰

盛人間如反手君才磊落天下奇四海賢儁誰不知五年
見子銅駝陌澹沲東風吹鬢絲朝爲石鼓詩暮奏鹿鳴雅
先生且卧鴻都下絳帳譚經澹瀟灑嗟我水車旱資舟嗟
君反衣狐白裘三月春心寄鳴雁南來飛過岳陽樓

爲王琴德

利

題泖湖漁舍圖卽送旋里

王郎昔居泖湖裏出戶觀漁並湖水王郎今作漁舍圖紙
上蘆菰北風起蘆花菰葉風蕭蕭煙深不見垂虹橋水澤
朝飛洞庭雨亭皋暮落吳江潮江上漁村帶寒蠟緩刺輕
舟向平遠波靜鳴榔月上遲日斜挂席風吹晚曉來網得
淞江鱸尊有清酒飯炊菰蘆簾紙閣夜颯颯風雨坐伴青
鐙孤就中隱約畫師意蒼茫一葉湖山次頗似蒲帆別岸
初迴頭恰見湖中寺只此丹青貌故山拂衣歸思向雲間

秋風夜火松陵驛唯有漁人認客還

酬胡君

業宏

我如游雲出廬霍千里飄飄向京洛黃山西畔初別君溪
流飲馬桃花落江南花落幾春風羈思漁陽飛塞鴻今年
乘舟玩海月片帆淮甸搖晴空西尋廬阜彭蠡側拂袖千
峯萬峯碧仙人一去白雲秋明月無心照石壁遠公東林
寺徐孺南昌宅寒草蒼煙昏似積我對青天空太息丹楓
十月凋南州雨聲寒抱章江樓登高把酒忽相遇昔君頗
料如今不明月寒胎耀當代楚望沈淪媚幽彩人間得失
似浮雲且對江山吾輩在清詩一唱碧霄間五色餘霞散
湖海湖海西風萬里吹酒闌明日各天涯青山挂席余將
去嗟爾塵埃玉樹姿

唐伯虎匡廬瀑布圖

江南萬重山匡廬乃出萬重上人言秋晴萬里峩嶢巔青
山一點東南望連峯蒼蒼不見頂日出彩煙生半嶺玉堂
石室藏其中縱有天風吹不冷羣巖環峙不可名巖端霞
氣升空行石梁忽貫青霞落倒海流雲走空壑萬谷鈞天
廣樂鳴思鳥哀猿一時作石門百仞當空開吳越江帆千
里來仰首見吳越俯首聞風雷何人攜杖凌倒影蕭條六
合誰友哉林岑藤蔦相撐拒驂鸞過處原無路世間惟有
銀河數派通濺珠飛玉流平處我昨乘小艇正出宮亭湖
湖心黯黯沈黛色夕陽一半開菰蒲是時初冬水不落懸
知崆峒巨壑轟千車傾崖曲岬天長雨山鬼幽篁人見無
咫尺未登疑有命評畫看山定誰勝煙雲絕境自人間文

采風流隔嘉靖流落當年惜異才江山尺絹今殘剩人生
衰老來無時五嶽求仙莫辭負

過天門山

鼓楫凌驚波連山缺東隅飄颻天門上千里見全吳鐘阜
何盤盤列城帶江湖風高黃雲動日落青天孤不見昭明
宮羅綺爲榛蕪草白風蕭蕭枯樹上嘯烏所以豪傑士竹
帛奮良圖良圖亦焉在樹立才須臾悲風與流水萬古一
歸墟不如和叩舷高歌稱釣徒

紫藤花下醉歌用竹垞原韻

紫藤書屋古椽櫟紫藤春花復秋槁紫藤架底讀書人吟
魂冢閉縈青草過從飲酒雕龍客百歲風鐙迹都掃由來
歷世猶駒隙安得長生服龜腦況余本性杞柳直戕賊彎

回成栲栳朝走黃沙暮歸坐便覺明鐙賢晝杲今日攜行
差快意佳士花陰共懷抱蚪龍兩榦擎空立瓊珞萬條垂
地倒晚春蜂蝶惜來遲夕照尊罍歸厭早賞花京洛稀常
遇吹鬢東風易先老承恩自昔如竹垞抵巇一旦辭瓊島
男兒恨不早歸去脫粟可餐衣布襖鄙人欲作雞棲桀多
士自欣魚在藻乘舸春水向江湖迴首花前幾人好

德州浮橋

運河繞齊魯勢若張大弓隈中抱泰嶽兩簫垂向東德州
倚河壩南北適要衝帆檣繞其外車馬出其中浮橋與流
水午貫相橫縱嗟我游中原來往如飛鴻弱冠一川水屢
照將成翁大澤涌飄雲滄海起飛龍鼓蕩漳汶氣日觀交
鴻濛落葉下河隄飛雨來淙淙觀河吾眼在憑檻望秋風

從千佛寺回過趵突泉暮飲張家園

濟南城南山正橫人言山前舜所耕崩榛衰草蔽秋色古
井深崖餘昔清曉入南山僧住院爲訪北宋人題名初陽
穿入洞窈曲佛龕鑿破山崢嶸大明湖動水雲白華不注
抽煙霧青惘然憑欄忽歎惜古人不與余同生南尋日觀
諒未可回念樂源重一經流穿山骨軸中出人遶漢魁輪
外行誰言渴馬半崖水解作黃牛三峽聲顯晦動靜一致
耳惜哉枉使羣兒驚敗荷衰柳下零亂夕陽逝雁高青冥
卻入荒園洗盞坐旁有小泉時復鳴

獲嘉渡河

河北山形壓天半左挾軍都東海岸雲騰風掣到河陽二
千餘里青一斷我來經過衛州西雲巘迴頭百回看竹林

亭立明玕清原泉飛下珍珠散想見幽人尙考槃安得同
歸脫鞅絆北風忽出白陘口吹渡秋河百川灌山川聊供
中流喜舟車顧有知津歎西南廣武數峯來屈指英雄幾
更換

應山至孝感道中

山光異遠近間若重樓花行人度高下起落波中槎足迹
未辨鄖隨國半生左史窺浮夸義陽關南出烏道縱觀蒼
壁澱朝霞野田茅屋秋未冷高藤翠木樛相加千峯南盡
出江面一鳥東可投吾家上游勢已據荆郢左肱曲更招
蘄巴胷吞雲夢不芥蒂囊括漢國無離孤宜有奇才表荆
楚不然深谷逃麇靡惜哉我行不得遇翩翩且逐投林鴉

萬壽寺松樹歌呈張祭酒

裕舉

萬壽寺有元朝松七株偃仰無一同五百餘年到今植幾
時變化風雨中我來頻見尙動色拏攬未敢趨當中甲戌
京華夏初及禮闈始散羣賢集翰林邀客會城西寺門正
帶朝暉入冥冥氣蓄雷霆寒颯颯風搖露枝溼是時同輩
八九人鼎也年纔逾二十同披單衫跣輕履一時散向松
間立風流諸客皆好文當筵意氣凌青雲有松嘗經幾輩
客高論松前曾幾聞自從車馬寺外分十年一半爲邱墳
甲戌察酒爲編修分校出邀同遊者張鏡壑閣學涵暉
助教馬牧儕舍人方午莊明府眉山孝廉今皆歿矣嗚
呼此地松猶在薄游曳杖僧窗外萬里秋吹遼海空重陰
晝塞西山隘獨聽颼颼恐欲生況經搖落情先廢借問種
松樹松樹何處無吾邑最南境何止百萬株上枝搖蕩潛
霍雲下根磅礴松山湖往往中有宋元植榮枯蘿蒿騰蹏

颺年少去之歸老夫何泥不歸使松孤君不念男兒莫待
齒髮脫無情松樹始長活

賞番圖爲李西華侍郎題

禹昔導川疏溝渠四載不及東南墟漫天漲海游龍魚西
界閩越東尾閩百島散處黑子如白漢不屬王無諸聖朝
持載配地輿鄭氏世竊蠻島居曷不稽首朝殿除 仁皇
在阼二紀餘天戈南指皆薊鋤設立郡縣軌同車御史監
郡法秦初歲在困敦月在余臨川黃門受詔書南征輶傳
前建旗舉帆度海風帷祛宣恩諭德徧里廬是時萬巢蒙
煦噓啟之闢之其檉梔遶屋種竹及芭苴枸櫞餘甘椰枏
欄四時青青百穀蔬流脂稻米有餘糴轉市海內連籩簠
吏治清靜絕詐狙因俗示禮兩相於海風不復遷鷄鴈番

人秉性豈異余與民雜處鷗并鷖春秋射獵山作陸篋帶
束腰瞻耳鑲身衣鹿皮弓箛箛沙魚登岸脫填淤距躍三
百如蟾蜍迹纏迹速升山岨舍矢麗龜及豪豬相聚牽臂
飲以醪好人怒獸或齟齬撫之有道難自紓草薶禽獮豈
義與使者治定靡紛拏乃命頒賞布燕譽天清海宴風颺
裾使者之幄面廣虛諸番部衆從長胥相排壓背壓驅馳
佩刀守將跪舉袂受命分賜金帛繻牽羊肩酒持巾帟旣
賜拜舞歡情攄蠻歌振股疑蚣蝮使者閱歲留未畚歸逾
江淮超青徐清廟重器升璠璣司空度地九澤濳藐彼外
郡鄰沮洳有番海上思欵獻道山延閣冊廣儲公與羣儒
聯珮琚春風思遠夢遶遶陳圖示客言旣且遼哉古放龍
蛇沮天子代來恩澤滑上褚中褚賜衣袂黃屋之國少躊

躋於今絕域覆腋肱魯雞伏鵠如蜀雞此圖稽典宜寶窟
乃知柔遠術不疏

歲除日與子穎登日觀觀日出作歌

泰山到海五百里日觀東看直一指萬峯海上碧沈沈象
伏龍蹲呼不起夜半雲海浮巖空雪山滅沒空雲中參旗
正拂天門西雲漢卻跨滄海東海隅雲光一綫動山如舞
袖招長風使君長髯真虬龍我亦鶴骨撐青穹天風飄飄
拂東向拄杖探出扶桑紅地底金輪幾及丈海右天雞纔
一唱不知萬頃馮夷宮併作紅光上天使君昔者大峨
眉堅冰磴滑乘如脂攀空極險才到頂夜看日出嘗如斯
其下濛濛萬青嶺中道江水而東之孤臣羈迹自歎息中
原有路歸無時此生忽忽俄在此故人偕君良共喜天以

昌君畫與詩又使分符泰山址男兒自負喬嶽身曾有大
海光明曜卽今同立岱宗頂豈復猶如世上人大地川原
紛四下中天日月環雙循山海微茫一卷石雲煙變滅千
朝昏馭氣終超萬物表東岱西峨何復論

同王禹卿馮拙齋游八公洞循招隱寺歸

潤州山雄如戰馬駢飲江中尻未下長波漂盡百興亡古
淚登高誰不灑不知更有南山南疊嶂雲關塞平野初穿
幽谷琅玕入卻聽細寶珠璣瀉陰陰鳥語萬朱櫻寂寂僧
居十蘭若兩君梵行正清修伴我蕭閒如結夏未須不二
問維摩風磬一聲言自窳空階久坐袂生寒小嶂試登筇
可捨更斟虎跑甘如乳重過竹林青沒踝豈徒公輩愛家
山我亦淹留爲白社江風吹面迂歸途還入喧聲攢萬瓦

雜詩

誰植高原樹花葉相離披幽陰上蔽日野鳥中巢之朝飛
呼其友暮宿呼其兒豈不樂平生久託終不移微霜變青
綠涼風又先吹餘葉猶滿林颯颯聲何悲四海諒云廣欲
逝顧裴裒獨食雖得飽不如羣食飢一夕不相親百年安
得知但冀藏弱羽奚必棲高枝

挾瑟昔侍君中宵錯明燭芳尊前旣陳衆女皆列幄不謂
微且鄙過蒙君顧辱爲君起新聲竭才自結束盼睐人心
移曾無待終曲堂上有萬里薄帷能蔽目親者巧有餘疏
者拙不足欲逝不敢違沈吟就別屋秋風拂階墀皎月如
寒玉恐欲傳清光爲人照幽獨

陽澤將被物秭鵲乃先噪天運苟不通密雲在西郊哲人

亦何爲託與萬物遨語默非有心進退一所遭嗟彼盛名
譁雖值禹與堯不容蓬艾閒乃有膾胥敖

握有荆山璧不以易銀鏐韶虞發高音陽阿何足謳高門
擊鐘磬尊爵缺獻酬酒肉雖飫人豪傑當懷羞不聞弋鸞
皇披羽持爲裘一朝毀周鼎鑄作棘與耨白首不能言小
子方咿嚶願舍中閨態君當聽道周

步陟高巖巔浮雲鬱如海扶桑升圓日眩曜生五采宛虹
首幽恆江漢控其尾氛霧倏清激島嶽乃錯峙俯聽深崢
嶸空曲巨聲起勃土充元天下達幽泉底倡始羲黃前萬
世卒未止傾耳魂九逝返乃得宮徵獨抱虛音歸中心竊
自喜寫曲欲遺誰冀有伶倫耳

題張篁邨萬木奇峯圖

一峯崛起天當中撐拄元氣開鴻濛左右闔闢兩巨壑逕
路各絕風雲通松風遠自雲中起搖蕩雲光山色裏水交
山斷置人家松響溪聲動窗几巖高谷迴居無鄰松林有
路無行人豈非高士嘗避秦自此千載無問津又疑靈境
與世隔乃是天地神物之所珍我家龍眠東西望兩谷口
每至夕陽時嵐光紛照牖日月逝矣身今衰芒屨竟隔青
崔嵬卻尋圖中幽谷到窮處忽有數峯天際來張君畫山
最得古人妙俯視百年畫史皆塵埃人家收得尺絹素屈
指不數王麓臺何況林卉與翎羽擾擾俗工何足取韓幹
戴嵩堪障壁徐熙周昉遺兒文落落平生山水情移將看
畫亦眼明於今安得張君死復生與余結茅共對青山青

游攝山

古佛菴有明
太祖御容

學道苦不深塵擾輒有損所賴行游趣養真復吾本況茲
絕靜麗深谷抱重巘始尋寺鐘來回視邨逕遠怪石倚礚
興奇柯冒巖偃幽日曖疏照流籟逝忽返偶接道人談世
外情亦惘久處山氣寒眺盡夕陽晚鳥宿人語絕暗響無
一遞圓月見松上長影散偃蹇邈當遺視聽於法求奧邇
達彼無生寂見茲有物搃豈必閉石窟沒齒食芝菌

鑿石龕像佛遠自齊梁爲累世導師居龍象固有儀何意
入僧室隆準乃可窺當時平僭亂四海誠福禔所嗟攀龍
鱗十九遭焚旃戰兢展遺像目角流干鉞想見劉宋輩曰
侍豈不危韞火息夜榻聞鐘逐晨麋朝日草露間往讀始
興碑慨歎閱千古誰識無成虧

米友仁楚江風雨圖卷

王養中藏後有友
仁自題七言詩

萬山欲駕雲飛去風雨江聲挾東注波翻雨橫客登樓天
地渾茫不知處藤厓高下懸太陰羶霧冥濛露江樹颯颯
風漂勁柯動急雨小停江浪涌低昂島嶼數舟行寂寞魚
龍暮天恐楚江晴甸亦蒼茫況值蕭條風雨涼山鬼含睇
帝子怨海洲忽近吳天荒破墨氤氲載元氣胸前突出山
川勢不須慘淡擬形模元是分明出層次君不見阿章早
許元暉繼楚山已進先皇祕此圖卷末復題詩南朝又見
顛翁字父子崢嶸書畫學江山慨歎遷移事五百年來江
自流江城余亦澹淹留借來寶墨流虹卷且慰無慘風雨
秋

贈戴東原

新聞高論詘田巴槐市秋來步落花羣士盛衰占碩果六

經明晦望萌芽漢儒止數揚雄氏魯使猶迷顏闔家未必
蒲輪徵晚至卽今名已動京華

寄和劉海峯三丈游伊闕之作

聞去梁園超廣武西登闕塞眺黃河伊陽風雨從中出洛
下山川向北多白髮上賓聊自許青春歸興復如何且從
浩蕩詩懷劇莫念沈淪壯歲過

一青仲孚往金陵屬訪耕南三丈消息

域中前輩盡積顏混迹劉伶尙閉關孤艇著書江水上百
年閱世酒尊間天邊落木流楊子秋盡寒雲出蔣山若憶
團亭舊漁釣挂帆明月共君還

榆中

直北天低見磧山黃河南下曲如環白榆夜雜雕戈戍青

草春稀牧馬還寒吹滿空雲出塞暮天無色日平關千秋
猶對秦時月多少功名大漠間

登永濟寺是中山舊園

中山王亦起臨濠萬馬中原返節旄坊第大功酬上將江
天小閣坐人豪綺羅昔有巖花見鐘磬今流石殿高憑檻
碧雲飛鳥外夕陽天壓廣陵濤

金陵曉發

湖海茫茫曉未分風煙漠漠棹還聞連宵雪壓橫江水半
壁山騰建業雲春氣卧龍將跋浪寒天斷鴈不成羣乘潮
鼓楫離淮口擊劍悲歌下海濱

邳州

遼闊山川縱遠游又敲風帽過邳州千秋遺蹟尋黃石一

片寒陽下白樓難得真龍逢漢帝易將窮虎縛溫侯英雄
潦倒尋常事情與曹瞞作畫籌

過汶上弔王彥章

楊劉兵度大梁危飲泣猶當奮一麾亂世烏飛難擇木男
兒豹死自留皮天連白草橫殘壘日落陰風擁大旗莫問
夾河爭戰地渾流徙去黍離離

夜起岳陽樓見月

高樓深夜靜秋空蕩蕩江湖積氣通萬頃波平天四面九
霄風定月當中雲間朱鳥峯何處水上蒼龍瑟未終便欲
拂衣瓊島外止留清嘯落湘東

蕩陰有懷嵇侍中

晉朝城壘結愁雲播蕩金輿此戰氛事去衰宏猶有血時

危繻葛不能軍冥鴻物外誰當篡野鶴雞中故不羣西望
山陽林竹盡寒聲蕭瑟詎堪聞

東梁山僧舍

津濤行復滯峽嶂路還緣石壁淩江閣風林隔浦舡鷗盤
嵯樹側狔出浪花巔往迹無傳伴春陰彌悄然

竹林寺懷王禹卿

盤磴上香臺雙峯倚檻開江流天影盡海氣地陰來左右
皆松響蕭條獨客回他時君到此空復憶徘徊

最高峯登眺

已上嶢嶢又佛臺正逢秋霽夕陽開地窮江海與天際山
自岷嶓夾水來南國中原同下顙華林衰草幾千回何當
住此雲霄上長與星房日馭陪

輓袁簡齋

早應詞科稱玉堂出臨大邑見文章流傳政牘吳歛裏得
助詩才蔣阜旁官罷買田如好時身亡起冢在桐鄉祇憐
行樂平生地門掩西州澹夕陽

文集珍傳一世間兼聞海外載舟還千篇少孺常隨事九
百虞初更解顏竈下媼通情委曲硯旁奴愛句嫋斑渾天
潭思胡爲者縱得侯芭亦等閒

館閣江湖並盛名芻苞今古手持衡當關報客無朝暮下
筆爐枯有性情羣輩角巾從郭泰公侯小巷候君卿希光
時彥今多少籬溷辛勤悵賦成

半世秦淮作水嬉沙棠舟送玉簫遲錦鐙耽宴韓熙載紅
粉驚狂杜牧之點綴江山成綺麗風流冠蓋競攀追煙花

六代銷沈後又到隨園感舊時

寒食雨

細雨冷風日夜催陰沈庭戶長莓苔山城樹底花頻墜關
路淮南客未來三月晚春悲老物百年後死待奇才坐看
暝色階前合北嚮寒空數鴈哀

翠微亭

蘭若門中山逕清攀躋幾折與雲平排空疊嶂穿城入鋪
地橫江隔樹明天運九秋如有怨人思萬古到無生奇文
腐草要同盡何用登高作賦名

題趙雨亭出關圖

葉君中子謫伊犁趙與有舊省之葉歿又往致其柩歸

冰雪天山照往來懸旌四見玉門開尊前渥赭顏如昔身
是唐朝老萬回

離思

畫角一聲江郭布帆幾疊風亭前日故人千里倚樓依舊
山青

敬敷書院值雪

空庭殘雪尙飄蕭時有栖鴉語寂寥久坐不知身世處起
登高閣見江潮

朱白泉觀察以僕往昔訪其先公運使於泰安時所
作詩文各一首同裝成卷見示感題

平生交友接龍門霽雪高山共酒尊立處不知天下小坐
中祇謂古人存文章海內亡知己旄節江東見後昆留得
白頭如夢過舊書重展落嘸痕

褚廷璋字左弢號筠心長洲人乾隆癸未進士改庶吉

士厯官侍讀學士有筠心書屋詩鈔

詩話筠心通等音字母之學熟於準夷回部山川風土纂西域圖志及西域同文志詩先學青邱繼宗元白饒有唐音

尋西蹟諸山

尋山不厭深遠與白雲合雲山互周遭一氣想輪納團團
明鏡圍點點青螺匝陰晴換朝昏清景赴遙睫人家梅花
市數里香複沓谿迴曉煙迷徑轉殘雪踏佳游及春歸攜
屐興屢愜林巒啟仙姿洞府謝塵劫指顧三山椒霞氣在
巾屨竟思驂青鸞一笑左神接

白恩縣至平原縣途間積水

官衢積行潦繞徑出禾畝縱橫買東西登頓失前後露葉
紛拂面風條亂捎肘紆迴深叢間屢誤問野叟大河仍前

山南集言卷之二
橫半浸隄上柳肩輿隨波軒擁衛戴而負鴉飛類銜尾猱
度象接手側踔泥徑橫斜奔石坡陡一里遲及三十步危
得九少焉赴夷塗孤塔露平阜村場轉碌礪籬案雜盆缶
瞥見貴客來喧駭及雞狗就陰老樹根晚風動林藪暫解
從役煩一掬清入口方塘水含漪嫩碧翦秋韭

自太湖縣至宿松縣境

乍入松滋雨似油小姑想像髻光浮秋雲萬本楓香驛野
水三篙桑落洲官冷漫勞雙弩候主賢虛借八行酬明晨
吳楚分南北灤皖龍眠是舊游

朱亭

一簇人煙密沿緣杜若洲市門低有樹山屋迴成樓網影
斜陽漏帆痕宿雨收最宜春水活檻外狎鳬鷗

沅陵道中觀夾岸諸山奇秀可喜

綠波如美人名山似良友故交縈夢寐家山別已久茲晨
覲羣皴若揖若招手彷彿會面初合志託儕耦或澤如少
年或蒼如耆耆或好如自愛或奇如獨負或如望矯足或
如思頰首或如吟聳肩或如笑哆口或據厖如坐或連岡
如走或戴樹如冠或垂藤如綬貌或莊且嚴品或端更厚
質或理而文氣或靜以壽左右應不暇倉猝遇惟偶擬繙
志乘名一一記誰某山花知我來爛漫吐紅黝山鳥知我
來啾啾競呼雒山雲知我來滃鬱自紛糾山靈知我來萬
象各開剖昌黎賦南山卓犖得未有我筆弱不振報之愧
瓊玖層巒影搖江一別清且瀏俯窺明鏡妝亦不我訾醜
山川能娛人有美且兼受

自辰谿舟行至瀘谿用玉松自激浦至辰谿道中韻
小雨辰谿道乘流兩槳間垂藤花麗殺夾樹鳥綿蠻雲墮
仙人屋風高帝女山翻嫌灘意穩不遣聽潺湲
拾薪波面女採鐵嶺頭人別種兼苗獮遺風信鬼神時清
谿少瘴戍古野餘燐往事傳吳孽茫茫感劫塵

良鄉早發

旅夢雄雞破肩輿納曙光曉寒憐半月新霽愛初陽鳥下
芙蓉渚蟲吟薜荔牆炊煙茅屋外秣隴間青黃

南平道中

南平山色佳峯巒互陵跨置身萬綠中衣袂與之化曉涼
風疎疎候已殊藻夏楓林數葉丹感此秋氣乍逶迤上白
沙旭影林際射坡陀八九重高下勢銜卸進步恃前猛稍

懈力不暇山腰簇人居結構倣臺榭飛簷翼奔泉百尺向
空瀉潺湲赴滄峽茶洋遞迎迓殷雷轉空壑萬古閱晨夜
不厭塵根喧濯纓就巖罅他年儻重過誅茅數弓借枕漱
高人蹤泉石本無價

西陽嶺

層青何崔巍左右束山峽喬蔭森參天巖巘互積壓中界
一綫隄登頓苦力怯萬古擅形勢風雲護周匝桓桓胡將
軍昔此駐戈鋌受困僞漢餘星沈一軍泣遺容依古佛香
火閱僧臘夜半松濤翻猶疑陣雲合官郵孟冬初倚筇凌
巖業書生愧毛錐懷古氣空懾蕭條四山風日晚冷巾袷
驚禽向客嘯撲面墮殘葉

登子陵釣臺

幾人高倚石闌看絕頂荒臺數百盤
山色剩分殘照紫江波留映客星寒
蒼涼雪月賢王館寂寞弓刀大將壇
只有磻溪殊出處千秋兩地一漁竿

董潮字曉滄號東亭海鹽人乾隆癸未進士改庶吉士
授編修有紅豆集

春日

素几橫秋水輕寒漫玉琴閒愁春雨歇
短夢落花深卧病生寥寂相思久滯淫
歸雲千里外杳杳故鄉心

晚霽

客意不堪晚憑欄暮氣橫斷虹明古澗
涼雨過高城鄉信懷千里寒蟬更一聲
太行山色好向我碧無情

馬上望西山

谷口遠煙微蒼然起寒色不知塵土中有此翠欲滴迴峯
斷歸雲半嶺積餘日鐘遙寺不分雪淺徑微出望眼極空
明新妝秣婉嬋征途逼歲新游子倦行役對此融心神庶
幾慰躑躅欲攜九節筇綫路通雙屐手攬碧芙蓉凌虛送
歸翼悵望渺靈源馬颯去安極

舟泊半山

去秋三度臨平路今日重來值禁煙寒食杏花山店酒春
風楊柳寺門船田園歸計知何日鷗鳥相思又隔年壞壁
閒尋舊題句雨昏殘墨尙依然

京口渡江

輕帆如葉下吳頭晚景蒼茫動客愁雲淨蕪城山過兩江
空瓜步雁橫秋鈴音幾處煙中寺鐙影誰家水上樓最是

二分明月好玉簫聲裏宿揚州

祝德麟字止堂號芷塘海甯人乾隆癸未進士改庶吉

士授編修歷官御史有悅親樓詩集

詩話芷塘早負文譽入詞林年甫冠乞假歸娶散館
引見日傳文忠尹文端方掌院奏對及之詩以性靈
爲主亦能驅遣故實高
者可擬其鄉初白翁

漂母祠

淮水湯湯拂柳絲韓侯遺蹟至今垂平生未報人恩處不
敢輕過漂母祠

咸陽懷古

金虎宮鄰事已遙雄圖想像祖龍驕闢開萬古官家局夢
斷三山水潮白壁尙疑天帝醉黃泉猶認八州招誰知
卽借燒書炬燒得阿房土盡焦

忽然亭長作官家創業甯徒馬上誇禍水未防身後雉天心終斷道前蛇金刀厯數開基正鐘室功臣報施差一樣寵姬輸項羽楚歌歌罷恨無涯

通天臺

清渭流無極高臺跡已平尋常興廢事何與沈初明

柴關嶺

水怒雲愁鳥語歡柴關立馬望中寬諸峯腳底小于豆身在半天風雨寒

馬伏波墓

飛鳳山南野草秋鳶聲長嘯使人愁威靈銅柱先諸葛潦霧蠻溪愧少游馬革有情尸可裹雲臺無命象難留滿墳薏苡離離實還擬明珠幾斛收

山海關

神武開天萬世功，真人駕馭必英雄。
家臣袞繡來姬旦，降表書辭得寶融。
電掃黃巾滄海畔，星馳金甲玉關東。
歸心豈假驅除力，雲氣飛揚滿沛豐。

李鐸字振文，號琪園，壽光人。乾隆癸未進士，改庶吉士，授檢討。歷官甯武同知，有琪園詩草。冷玉巖集。

摩訶峯下作

偶然碧山下，衣袂薄天風。
清磬有時落，白雲無路通。
遠人秋色裏，斷雨夕陽中。
目送僧歸去，千林柿葉紅。

曹焜字素爲，號小牧，又號秋漁。嘉善人。乾隆癸未進士，歷官嘉定知府，改戶部員外郎，有小牧吟稿、楚游草。

詩話：秋漁初守嘉定，坐事罷官，旋從征金川，復起，歷禮戶二曹，以養親乞歸，遂不復出。

和杜凝臺觀察登雅州城樓

獨據胡牀嘯遠雩冉駹邛笮望中分
劃開玉斧浮春漲鑿破銅山闕夕曛
闔外量沙才似斗渡頭揮扇氣如雲
風流江左今誰屬談笑還應冠一軍

千疊礪門落照中旌旗猶記漢時功
橫磨十萬邊塵暗直指西南使節通
出塞風雲思壯士登壇劍珮識元戎
聖朝聲教原無外未忍蠻陬阻會同

從軍兩度閱秋冬蕉鹿偏教得失重
叱馭未妨過峻阪詫牛曾此勸春農
朝開毳帳炎風入夜草邊書凍墨濃
慙愧白衣猶領職揚舲三月下巴賓

李調元字雨村綿州人乾隆癸未進士
厯官直隸通永兵備道有童山詩集

由白塔灞渡東津

出郭眇遙岑過渡得佳境長風走溪聲落日橫塔影入林
路愈細村口光耿耿髣髴別有天雞犬自閭井不見打魚
人但見釣魚艇

黃州晚泊

赤壁煙初合烏林月欲升鳥投遙岸樹人語隔江鐙夢去
家疑近愁來枕自憑天涯游子意寒夜總難勝

清遠峽

日日看山行山亦日日變就中數清遠造物工鍛鍊危崖
勢欲合巨靈擘兩片鑿開混沌天中通江一綫泉多伏莽
飛石半臨江斷雲截峯腰齊雨洗巖容換木客解吟詩楓
人盡目悍樹根長於蛇入壁忽不見但聞隔澗中時有猿

相喚所見旋卽忘究竟空健羨不如坐孤舟讀盡書一卷
舟中晚興

漫說心如箭其如棹泊遲人喧上灘處鷗避下帆時路轉
山猶見鐘鳴寺始知回頭語黃帽此地正宜詩

袁樹字豆村號香亭仁和人乾隆癸未進士歷官肇慶
知府有紅豆村人詩藁

傷春

幾樹鶯囀酒半醺聲聲喚起杜司勳初三斜月今宵見第
一春雷昨夜聞愁欲遣時偏聽雨夢初回處尙疑雲沈郎
腰本無多少又被東風瘦幾分

乍減東風二月寒雨痕猶溼小闌干荷珠傾處重圓易蕉
葉開時再捲難綠酒我能澆塊壘黃梁人自夢邯鄲柳條

惹得離情亂只管青青繫玉鞍

磨盤山中遇雨

亂山急雨來匹馬騁孤往雲裏馬蹏重雨壓風頭響急泉
奔下山匹練平如掌

苦雨無聊偶憶隨園秦淮風景爲詩二章分寄家兄
存齋陸甥豫庭

梅雨聲中想六朝隨園形勝鬱岵巖琴彈一曲雲生榻水
發雙溪響過橋熟鳥不驚棋子落新詩能讀女兒嬌

謂姪女成

兒風光我又經年別愁說江南歸路遙

此日秦淮日正長綠楊紅袖影雙雙月明歌管常無夜水
長鐙船直並窗家裏小山藏古洞渡頭花片撲春缸潮生
潮落翻新句流得詩情入大江

曉起東曲江

曉起闌珊病未瘥幽窗倦啟眼婆娑斜風深院狂吹樹小
雨湘簾冷作波花意引回香力細秋思分與雁聲多茂陵
同是天涯客可也書空喚奈何

惆悵

惆悵桓家作馬曹渴來枉自憶松醪雨添秋汛濤聲大月
近黃河露氣高笳鼓半城吹斷雁星辰午夜逼征袍涼天
辜負文衾滑歸計年年折大刀

京口阻風

客與舟俱駐山沈日又昏水寒星到底江近月當門風色
占旗角潮生辨岸痕回看南翥雁遠影過前村

觀音巖

突帆一峯孤俯仰羣山小深壑鎮潛鯨長空阻飛鳥直上
接穹窿猶覺青未了石乳滴成枝倒挂玉龍爪洞戶啟山
根飛樓駕雲表石旛自古今清磬無昏曉我欲拜南無六
塵徒擾擾

王嵩高字海山號少林寶應人乾隆癸未進士歷官平

樂知府有小樓詩集

王蘭泉曰少林門第清華樓村殿撰白田庶子皆其
大父行文學之傳師承有自故發於詩或幽靜而閑
止或奔騰而排奐音節
自然駿駿入前賢之室
詩話少林知名最早其游梁集畢秋帆尚書選入吳
會英才集中晚年與甌北談祁陽往事一詩卽感懷
尚書而作詩多和平淵雅間有縱筆爲瑰麗亦無輕
薄叫囂之習以小樓名集足繼樓村而不失家法也

焦山夜話

顛風吹塔鈴環山大波湧虛堂佛火明嗒然無怖恐高詠

湖坡公後先堪繼踵宵深人未眠神清骨愈聳鼎摩雲雷
紋鶴憶青田種呼童啟巖扉霰雪皓已擁總持饒逸興得
句如璧拱蠟屐儻相邀余亦賈餘勇

太皞宓犧氏陵

邃古傳神母流光感赤虹龍書彰聖瑞日角表皇躬肇啟
苞符祕能侔造化功紀元開運會畫卦判洪濛理協陰陽
始幾參象數終三才咸有統六位嬪無窮姬孔淵源在炎
黃謚號同補天咨帝妹勅字授臣工任宿沿風姓庭巢列
禪通混茫都邑改魏煥寢園崇紺殿凌霄漢丹陵接華嵩
握圖容自肅衣卉道彌沖作者斯文祖欽哉望秩隆聖朝
稽典禮謨誥述龐鴻日月觚棱外乾坤法象中白龜淪蔡
水蒼檜擁齋宮幽贊誠何極靈蓍滿百叢

玉階怨

班姬辭輦後，紈扇雪霜侵。
妾貌那堪惜，君恩良自深。
廣庭萋綠草，華殿起秋陰。
猶勝長門者，空輪買賦金。

盱眙懷常尉建

昔人耽吏隱，曾此駐高軒。
白日無公事，青山滿縣門。
調琴寄幽興，拄笏欲忘言。
不見神仙尉，詩成誰與論。

龍山寺別念昔二叔

犂犂行陂陀，蒼然四山暮。
淡月生前峯，照見招提路。
遠水送孤舟，長天隱春樹。
漁鐘波外懸，僧磬煙中度。
怱悵竹林人，來朝峭帆去。

羅兩峯畫鬼趣圖

羅生畫手今所無，遊戲乃作鬼。
董狐希求虛怯墮，彼趣修。

羅豈與人羣殊以清淨眼燭幽昧出神通力追形模你彌
游觀恒黎御五百城渚環睢盱華鬘象馬有威德蓬裸或
被諸天驅佛云餓鬼三十六鍼毛炬口焦皮膚億耳索水
那得飲造十惡業生三塗興酣潑墨寫精怪青林月黑煙
模糊髑髏人立相向語陰風颯颯鵠鵠呼魃頭碩腹厥狀
醜伶仃瘦骨撐朽株奇鬼搏人面藍色勒那繡利招其徒
誰持敝蓋插蕉扇強者頤指弱者趨愛河沈溺不知厭韶
顏一瞬鳩槃茶無常旁瞰吁可畏譬若灌頂涼醍醐羅生
寫此非玩世願離五欲求真吾貪嗔癡愛皆妄想神識昏
情空頑軀劉龍營財笑撫掌送人作郡遭挪揄得錢肯許
定伯賣醉歸勿倩黎邱扶坡公好說姑妄聽阮瞻持論無
乃迂然犀照水太相逼鑄鼎象物疇能遁道子曾摹地獄

相龔開亦有搜山圖荒唐弔詭擅能事要從恐怖生怡娛
請君盟手繪大士慈雲香海青蓮趺竹林晝靜散花雨楊
枝甘露霑冥途一切有情盡迴向羣生各得衣中珠夔魑
罔兩久潛匿煙雲變滅歸須臾青天白日大歡喜辟邪安
用懸桃符

江研農楊柳枝詞畫冊

垂虹宛轉赤闌橋幾樹依依學舞腰至竟不知攀折苦春
來依舊綰長條

柔條初種不勝鴉青粉牆邊問阿家恰悔當初容易別幾
番飛絮又飛花

甌北譚祁陽往事有感次韻

黃梁夢裏記曾游爭羨陶公督八州燕去空堂巢已覆鶴

歸華表冢難求論詩跌宕鬚眉在話舊淒涼涕泗流同是
故人兼故吏相看霜雪各盈頭

張九鉞字度西號紫峴湘潭人乾隆壬午舉人癸未明

通榜官海陽知縣有陶園集

詩話紫峴年十三登采石磯太白樓賦詩西師凱還
行郊勞禮方恪敏督直隸築臺於郊紫峴爲賦詩書
其上晚游武昌畢靈巖大會賓客紫峴詩先成並爲
時所稱其爲詩奇情壯采沈博絕麗在乾隆中自是
一作手

夜宿七級聞水聲有感

秋雨打孤篷游子中夜覺篝鐙淒以涼百物下寥闊開口
何嗷嘈一夜積濤聲抑揚疑遠近往返雜歌哭低吟不能
長萬感滿胸曲想見故山阿流泉灌茅屋荷鋤覘遠脈濯
足亂新綠幽期隔塵沙歲月惜局促南蕪久思張北土不

輕陸鄉思逐推遷
羈愁震耳目
此身尙惆悵
所宅亦未卜
壯齒不恆居
古言有三復
起弄明月流
溼光滴衣幅

暮過高郵州

璧社湖深水指東
玩珠樓影拂征篷
荻花香冷歌前月
蒲葉聲多酒後風
鄉夢夜兼柔艣發
詩懷秋與遠煙空
文游臺畔登臨意
一枕寒螿恨未窮

回山行

卽道
士狀

青山不放江出楚
北斗茫茫落洲渚
天兵破浪斬青冥
雲夢瀟湘罅如縷
青冥罅裏擎舟上
逼眼精靈狎空曠
舵側檣回變怪生
若與舟爭誰肯讓
雪骨崩空朽龍虎
皺皮削屑生霜雨
西風巫峽搖臂腳
東旭金焦吐門戶
石根駕濤裊相逼
濛濛沖融嵌虛碧
半占青天烏鵲巢
下沈斜日黿

鼉宅枯楓老杉皆十圍根盤蛇蜴葉倒垂寺門高開大竹
翳陰風或恐來山夔下臨公瑾散花洲南屏遠映宿霧收
棹聲嘔啞落空翠鳬鷺散亂淩清秋造物好奇不好平幽
人於此得性情玲瓏破碎那自惜夢魂圖畫生其精采石
馬當猶趁客及茲每歎飄毫髮安得冥冥萬丈梯舉袖長
揮失吳越

哀太倉龔生肩吾

乾坤無處置狂才只合抽身走夜臺筆落鬼神終避燄哭
殘山水爲留哀塞高雞鹿彎弓出梁擁黿鼉草檄來大府
機謀誰倚仗一樽空自酌蒼苔

名場不惜拔螯弧經史填胸得氣麤一卷丹黃樊紹述平
生名字庾肩吾曾傾美醞看余飲不道雄譚失子孤撲棗

貫裘歌散盡章江風雨夜模糊

渡盤龍江

馬影與人語斜陽共一溪鳥歸滇海外雪在五華西客事
惟山水幽尋有笮黎誰能作拘檢擁卷聽晨雞

山陰潘筠軒學士招同汪九觀旂沈大儼齋集冶城
寓軒時學士自大梁返

美人天際留不得飄零反作長干客大江不洗宮錦袍仍
帶玉堂舊顏色三花攜出少室山梁園詞賦爭追攀歸來
黃金快手盡笑對文君眉黛寒謝公墩前一招手爲余吹
笛秦淮口叱散南朝裙屐人隔林呼到王曇首東山何必
攜絲竹讀書論文豪亦足薰風繞室汎紅蘭斜日搖樽鳴
翠木前楹移席杯縱橫更闌涼露下不驚蔣山明星落四

五月華欲向東南傾昨夜天雞曉一聲引我天姥峯頭行
鏡湖荷花三百里中有山東狂李先生只說鏡湖好但
有鱸魚歸及早明日相思京口舟他時並馬山陰道

覆箱峯下題彭氏書樓

獨汝村居好千峯立戶前桃花一溪雨楓葉半樓天捉蠶
翻衣溼呼兒網鯉旋此中事儒術亦足抵神仙

訪李望都敏夫不值

別子青山短簿祠十年放浪欲何之未成夢澤撈蝦侶且
逐并州食雁兒枯澗薄冰行客路空林黃葉曉愁時如今
各逐風塵去不必相逢話夙期

題唐三龕佛像記名刻後

中郎石經立太學六經文字天完新蘭臺漆書掃謬誤勢

壯河嶽光星辰千車聚觀日闌咽摹寫紙貴傳八分黃初
補以三字體兼學魯鮒邯鄲淳四十八枚列兩廡聖典一
綫懸嶙峋所傷浮屠立精舍毀以作壁繪鬼神牧童坐踞
鼯鼠宿拋擲灋水蒙荆榛嗚呼此經遭此厄不殊秦火爲
燔焚隋唐遷移蕩然盡洛陽無復留貞珉二千年落人間
者毫芒猶可爭瑤琨雖鼎敵敦結夢想好古之士羣酸辛
三龕作記伊何人風霜不剝雷不斂大書深刻驕千春

晚晴移詩匯卷九十二目錄

費淳 一首

沈初 四首

吳省欽 四首

施朝幹 十首

韋謙恆 十首

蘇去疾 三首

屠紳 七首

潘相 四首

吳森 九首

齊翀 五首

劉啟秀 四首

李集 一首

魯鴻 二首

張世法 二首

張熙純 一首

傅玉書 五首

李衍孫 五首

趙帥 六首

吳錫麟 二首

羅有高 十首

劉應陞 十六首

田榮庭 一首

萬鍾傑 一首

姚念曾 二首

朱黼 七首

宋鳴謙 一首

樂三省 一首

劉士璋 二首

劉豹 一首

賈炎 二首

晚晴移詩匯卷九十二

徐世昌

費淳字筠浦錢塘人乾隆癸未進士授刑部主事官至

體仁閣大學士諡文恪

詩話文恪初守太原民爭水利令開渠分漑渠成民築橋其上日費公橋游擢蘇撫值歲旱晚赤日中三日乃雨民爲繪圖賦詩以頌督兩江長兵部奉使行河經畫周密遂正揆席坐事左遷復長工部年七十而卒命還舊秩用輔臣例予卹

蛟川包節婦詩

蒼松摧勁枝女蘿失所託憔悴當秋風枯條自纏絡哀哀寡婦心俯仰傷搖落遺腹有孤兒一綫何單弱貞心事鞠拊逝者如可作老翁況垂白眊勉奉羹臠何期天不弔祝融復爲虐劬勞信備嘗誰能恤惻獨熒熒三十年雙淚血

枯涸慈烏毛羽豐悲鳴動寥廓恩暉蕩白日光明澈泉壑
苦節或可酬綽楔雙金腹彫松有根菱豈繁老叢薄

沈初字景初號萃巖又號雲椒平湖人乾隆壬午以舉
人召試授內閣中書癸未一甲二名進士授編修官

至戶部尙書諡文恪有蘭韻堂詩集

詩語文恪初生有叔子金環之兆乾隆季年佐樞密
世稱其不立異不苟同謂爲難能詩以清雋勝汪容
甫作序爲品目曰深微遠適詩前每以儷語作小序
蓋文恪夙工此體侍內廷日上金川平定詩冊作散
行序泰陵顧曰爾善四六亦學
古文乎今文集中仍以古文爲多

寄朱笠亭

隔年離恨未能平
根觸空庭暮雨聲
幾日青苔連竹榻
一春綠樹掩柴荆
風雲徑路空遼絕
詩酒情懷懶送迎
便欲攜琴尋叔夜
坐看海月沓潮生

秦淮春泛

雪色單衫汗酒紅客愁一路棹聲中
詩情添似桃花水春夢輕於柳絮風
綠野亭臺千里隔碧城消息幾時通
江流不逐征帆去卻與人心只向東

阮吾山邀同徐松厂祝芷塘過法源寺看海棠和吾山原韻

昨朝歸騎隨春風牆頭始見繁枝紅
頗思江南好春色懊恨殘夢催晨鐘
丁甯將車不辭遠準待明日尋城東
愛花正值探花使招提一樹晴霞烘
卻如有語向元子只恐欲睡聞蘇公
多情豈必謝兒女旖旎自解憐柔蹤
紅苞乍拆最嬌小深意含蓄詩人胸
香車寶馬滿京國藏春卻在禪門空
虛堂梵放下夕鳥濛濛花影煙光籠

下直聞蟬

本以清高者而來紫禁中質輕惟受露聲遠不因風漫憶
林陰靜偏依殿角崇莫嫌幽趣少歎暑聽全空

吳省欽字冲之南匯人乾隆癸未進士改庶吉士授編
修官至左都御史有白華草堂詩鈔

觀景德鎮所造內窯瓷器

鄱湖鬼吐青紅煙火龍十里無停鞭百蟲將軍告薪盡多
錢巨賈徠鳴舡街衢洞達萬家聚人不得顧車難還人間
伎巧繫天象茲直熒惑星文懸居民燒瓷謝龐雜瓷其禾
菽窯其田龍鸞花果鬪新樣內窯入手尤精專叢祠徧迎
春秋社桑主羣題風火仙維國六職工居一埏埴製僅同
杯捲越窯奪翠昉唐代燒進遂著婆留錢十三州割據猶

爾矧乃趙宋金甌全官哥汝均定繼起到今應換車渠干
有明作者論時會景陵茂陵歸我妍鬪雞缸教白波卷鬪
蟀盆候金風旋侯家廟市間有此萊陽粉盞吟爭傳方今
聖德邁三五豈數衣阜焚裘賢汝倭稽首匠心巧聊以官
守申卷卷白芨斷紋妙鉤鎖青天缺雲映嬋嬾就中慎選
當方物包匭藉用兜羅綿其餘入肆尙高價合貯廣夏鋪
細旃我稽五行演疇範生於其地良弗遷瑤流祇挹浮梁
水青料還購金華巔祁門採石擣泥細涓村披沙結胎堅
伐毛洗髓理太酷如人去滓來虛元入窯而還善千變火
候那許毫釐偏又如學士造道法急火慢火心頭然遂令
法物照青眼赤手扶出瑤枝鮮盛朝醞化狹區宇日月醺
甕歸陶甄異物不貴貴用物苦窳間作非勤宣禮云考工

易尙象將偕匏器郊格天如珍商瑚寶軒鼎金石貞吉隨
摩編

前蜀王錯書妙法蓮華經第一卷殘葉三臺鄭尹出

自琴泉寺圯塔同魚門璞函作

墨華香簇蓮華青僞朝平章工寫經教圓義正樹功德梓
州宰堵牢藏局丙寅未月倒霹靂焚夾灰燼呢剎靈令君
好事拾殘葉紙色黯淡光精熒武成三年字如漆龍象擁
衛旃檀馨維唐中原遺末造行歌機略難拘囹十軍阿父
坐延虎公然作賊來郊垌紫旗怒麾南寨破此州入手開
魏廳混元一圖告符瑞建號穩踞金牀釘兩川割據國雖
小肯以身舍騰譏詒佛牙奉獻典最祕僧目抉進恩還停
爾時臣錯被殊遇勸設寫官籤乙丁有來骨相似羅難玉

豪光涌祥麟廷錯也染翰讀其象清詞麗句鏘玲玎無端
兔命受鷹制水行仙者躬宸屏疇咨六軍判諸衛而使戈
甲驚祆魑唐魂招來禮孔熈聖鑑觀去輝微燼從容筆諫
竟何有徒舉觥令浮綠醕此州亦係幸游地銀漢曲許人
間聽堂堂觀察

宋光葆

暗通款可有替戾搖風鈴東朝六萬

疾於捲回鶻小隊嗟鈴玎降書至竟出公手負荆輿槐天
晦暝野狐泉邊急刺到坐視爾主羅嚴刑知爾默邀大慈
護一行摺去身腰鞆區區忠孝讓希濟賦詩吠主顏長顏
要其僉名乞歸葬伏鑣幾致膏青萍宗壽一言晚幸中淨
福豈或資重冥壽於文札等清絕沖妙之觀藏緇縕何如
此本閩人代麻茶雙眼回隴鈴直同屑金煥濃采不藉鍼
血沾餘腥想當蚤朝暮歸第白籐笈子平頭拾霞光百番

賜天府眉硯安傍朱窗櫺毒惱已蠲苾芻佩妙明頓見琉璃瓶伏梁闔檻庋藏永謂仗白業貽懽甯塔成塔毀難逆料放佚千百存奇零其臨唐諱筆不缺與孟石經殊模形舊君舊國性根淺雅藻空復翩亭亭是經居尊品居首莊誦萬一昭聳瞑柳公度人褚遺教誰若螢爚誰日星塔輒殘字儻容拓更乞裝示傳遐齡

尹伯奇琴臺

臺下淚波腥臺前病葉零沈江娥嫋節在鎬娉分型釁起門帷舛聽綠室第熒履霜彈切切激瀨和泠泠掩袂哀誰俵褰裳恨未瞑莽蜂身恟怳離黍弟伶仃死孝愚夫憫徠神醉覲靈狻聲連古峽蘆影斷疏汀親過磯難已家屯網適丁放流循皓白悲怨達蒼冥地補桑經注圖遺孔殿形

申生量一概公道在西銘

石符搨本

廣元縣東百丈關水中有石大如席上有文如符人謂之石符傳是張道陵所書佩

之能辟邪
孕注男

扶桑繭紙凍雲墜似符非符字非字其橫三尺縱一尋七
劍在腰一槩植嚴關百丈厓陡懸厓下江聲響泐潺沿江
上下谿勢又貼卧盤陀淨苔翠夏漲能禁魚潦黏曉鐘定
使烏朝避中央如鏡天剏工言是道陵手摩記樵蘇絕跡
漁釣稀響搨登登強羅致高牙大旆山鬼驚對仗垂旒瀆
靈衛縵文糾結繆篆粗誦者生箝捫者畏堂楣高揭輝日
星爲是宜男許留佩陰陽水火千劫沈伯道無兒命所制
五斗應從鄰郡傳三丰或自前朝至青蛇無袖呵叱來化
入蒼紋露真氣羅浮竹葉猶爾爲似此瓌奇古無二得毋

漢相簪筆餘暗勒仙銘妙垂示木牛銅釜隨燼煙獨有一
卷鎮鼎屢呼童檢點牢記將勿遣火薰與日曬五雷劈裂
黃石飛且把陰符枕函祕

施朝幹字培叔號鐵如儀徵人乾隆癸未進士歷官宗
人府府丞有六義齋陵陽正聲諸集

王德甫曰鐵如少以詩名王光祿鳴盛吳中十子之
刻鐵如居其首住京師杜門卻掃忍飢誦經故其詩
文蒼然而秀穆然而深秩然一規於正

詩話鐵如性廉介爲京朝官敝車羸馬罕接賓客論
詩謂當以復古之才寓獨造之意所作樸質清真錢
竹汀稱其氣格在高岑李
王之問可謂不愧所言矣

游汪氏莊同沙根雲作

春風吹客心曠望倚喬林忽見落花溼方知流水深野雲
留澹影山鳥遞清音偶語空亭下幽期好重尋

空山

空山時向午佇立依荆扉客至鳥聲亂風生涼氣微洩雲
含夏木疏雨帶晴暉且復傾茶碗幽襟自不違

覆舟行爲張春帆作

十月那得飛霹靂風來挾水水衝擊船頭倒曳船底高一
聲下落幽宮闐衆客爭抱危檣出徐上鄰船各相覓一客
未見衆悲傷須臾卻走過蘆荻張子負才氣志本輕江湖
渡江舟覆死亦易慷慨尙與常人殊我今爲子喜無恙神
魂不定翻驚吁太陰鼓氣森黼黻糾紛百怪來深谷張口
食人亦愛才下士大笑奇士哭馮夷傲睨舞且歌千里萬
里無平陸但使一日身不死回身又向此中逐嗟哉行路
難茫茫若登天登天苦寥廓行路憂迍邐君不見發鳩山

形勝卷之九十二
中有精衛銜石填海海水逝

懷張暮青

故人春過白雲岑書札經年感別心何日酒杯同灑淚干
秋懷抱獨鳴琴江清坐久寒花淡風起簾開夜月深遙憶
謝公亭下路一家歌詠有遺音

邵伯埭

早發平湖口驚看絕岸虛水中生白屋木杪接行魚世憶
南朝遠籌非太傅疏欲裁溝洫志感歎望青徐

寄汪存南

汪子豪氣不可羈昔我見之青溪湄踉蹌布袍半碎裂白
眼肯顧膏梁兒堆阜崢嶸塞方寸喑鳴萬里天風吹長江
大河入几席黑龍向人頭倒垂子遺我書值除夕反覆展

着言數百書久未報心茫然祇恐忽卒孤肝膈古來出處
各有道處非遠志出小草屈原懷石杜甫亡輕薄爲文苦
顛倒今子紀年踰二十齊諧博物堪搜討我年較長逐飛
鴻照鏡朱顏難自保御溝楊柳春青青忽思白下煙飄零
鐙船鼓吹歌已矣夜飲五子誰能醒此時張君暮偕子卧
吾與蔡子芷衫行前庭郭生崧自起添爐火煮茗座上流芳
馨三更急雨鳴屋角舉頭不辨河與星悲喜變化在俄頃
辭家去里皆伶俜吁嗟乎雞蟲得失無休歇郵良一去驂
騶蹶勸子孤吟廿四橋淒涼莫怨揚州月存南時客廣陵

申拂珊先生扈蹕歸自木蘭

清塵雲罕大蒐還劍珮從容水石間寒到五更衣上月秋
橫數點馬頭山寨門回指牛羊靜輦道平看竹木閒幾日

天書新草罷車攻高詠冠朝班

冬夜卽事簡景雲客

山對重城倚檻看無邊竹柏隱雲端疏鐘度水一聲靜
白月橫天萬影寒早晚魚飧從計拙關山風雪識交難猶聞
公輩多才者懷古蒼茫語夜闌

聞琵琶

琵琶絃急對秋清彈作關山久別情借問黃河東去水幾
時流盡斷腸聲

南旺

南旺臺上朝光清仙風送我西南行浩歌卻指海雲出七
十二泉天際聲

韋謙恆字慎旃號約軒又號木翁蕪湖人乾隆癸未一

甲三名進士授編修官至貴州巡撫降鴻臚寺少卿

有傳經堂詩鈔

詩話木翁詩專主性靈其至情語動人心竊與隨園藏園詩派相近而淺易之病亦同

王昭君

不恨丹青誤惟期報國恩邊塵如可靖妾命不須論月送關中騎春歸塞上魂紅顏安社稷青史至今存

過清流關

東南半壁勢全收奕奕雄關據上游五代烽煙餘故壘一天風雨入殘秋亂山自向孤城繞野水還歸別澗流忽憶醉翁呼不起獨攜尊酒倚高樓

寄徐孝廉位山先生

此日談經客先生尙典型三朝頭已白八十眼猶青人列

儒林傳天留處士星何時載尊酒一訪子雲亭

登姑孰城樓

丹陽城接大江流雉堞猶餘六代秋白紵歌隨元子去青
山名爲謝公留樓臺迤邐輕煙合吳楚微茫落照浮最喜
女牆吟眺處鳴榔聲動見漁舟

與秦澗泉修撰話舊

白下城邊繫短橈故人重此對吟瓢半簾晴雪圍爐坐拾
得松枝話六朝

山色都將積雪封煙寒何處覓游踪十年舊事從頭說一
榻長干共暮鐘

寄梁山舟侍講

之子媚幽獨翩然返故廬蓴絲三月暮貝葉一鐙餘但見

黃塵遠甯教白社虛春愁滿湖上吟興復何如

憶昔持尊酒時時共短吟月明秋水淨花落夕陽深舊夢

中宵覺離懷隔歲侵空餘擘窠字遙見故人心

頃書瓦巖山房額見

寄

秋日雨後同朱笥河學士宋小巖洗馬曹竹虛中允
褚筠心侍讀集汪持齋閣學邸舍時談及鄧尉山
桂華之盛故有落句

書局恩恩策馬回招要重到小蓬萊半天雨勢龍銜去一
片秋聲雁帶來桑落肯僻今日醉桂華應傍故園開吳中
風景資談柄促坐渾忘漏點催

夢草亭獨坐適八弟定旃洛中書至

碧梧深柳宛吾廬短笈迴廊任所如孤艇泛從殘雨後好

山看到夕陽初池塘春草連宵夢宛洛秋風尺素書莫向南天頻悵望畫圖終日正相於

蘇去疾字獻之常熟人乾隆癸未進士改庶吉士授刑

部主事歷官都勻同知有涉藝園集

王蘭泉曰獻之樹節孤峭天懷夷曠風嗜常以張覆輿殷伯巖爲比樂府最古質奇奧然如河漢淡無影滄江流有聲夜涼風還起明月滿前林又極清遠蕭澹

代飛來雙白鵲

四鳥生高山羽翼日已齊銜羽復接翼啾啾何悽悽問鳥何所規稱我黃口時四體少羽毛待哺常聲悲中道痛失哺八翼共因依朝拾覆車粟暮還空城棲踟蹰蓬蒿居性命宜無違子有山海志安能久卑棲風雨一交際東西南北飛我欲隨汝去一身悲斧斯勸汝依藩籬憂汝寒與飢

交頸長太息淚落空復爲迴顧世間人和樂真不支

獨游

獨游泉上寺篁翠雜衣涼灌木吟山路春禽向夕陽禪房
深晚秀空谷靜天香坐對雙溪水濠梁辨未忘

秋盡懷八繡丈客蜀中

涼風在羣木萬壑有哀音天末應搔首千山起暮吟洞庭
波始闊峽水月常陰魂夢猶難到愁君白髮侵

屠紳字賢書號笏巖江陰人乾隆癸未進士歷官廣州

通判有笏巖詩彙

詩話笏巖早與洪北江游北江詩話評其詩如栽盆
紅藥蓄昭文魚又玉塵集載數則稱其弱冠通籍詩
有雋才最愛其古體嘉禾篇贈周明府送陳伯玉偕
黃仲則飲旗亭憶某上人諸作近體則舉風雨十年
留鐵甕雲山一夕話銅官二語又極賞其芒碭山行
有云秦煙蒼蒼漢月白行人屏息過大澤以爲不滅

亭長歸來作天子句今全集不傳同邑金莊生刊其
鵲亭詩話輯錄遺詩十數篇附之北江所稱者僅存
近體一首餘皆不可見矣詩話多寓言不盡論詩又
撰六合內外鎖言及蟬史皆小說家言詼詭好奇可
爲人見其

阿井泉

洪濛鑿無朕禽敷漏天一物母之胚胎璫源閔璇室帝矜
塵土焦無以植甲乙元氣不流潤維民昧陰陽凝承俾元
冥澤逮沈所出魍魎隨支祁枕流被訶叱始疑禹導荷靈
脈隱瀝汨上壽萃中古滋生罔多術後人尙頤養丹液苦
堙窒遂啟阿大夫疏渠豁蒙密泉超釀及醴井合鹽與橘
清濟濁河外澄泓夜瑟瑟銀鐏火爍金黑衛革如漆桐桑
類靈蟠入藥過仙尤長官柄率育洞酌道慈恤狂是棄廉
泉烹齊竟口實更聞清冷初渴飲成腹疾受福非偶然精

多詎蠲吉聖人惻我心燮理有始卒煎熾於洪鑪羣生意
翔逸

臨清觀萬人冢

釜底游魂竄不死郊原夜半號鬼子傳聞蘭若容萬人鼠
穴憑陵鬧如市已推佛骨倒獅座復壞僧廚堆馬矢妖童
裹頭女窄袖刃在其頸寐而喜前載鬼車後虎偃犬羊自
礪熊羆齒吁嗟濟淥多祲田齊繭繅絲比羅綺蝨蟥盤無端
作皿蟲耕奴之禍連織婢朝廷恩逮乃祖父萑苻勢合羣
臂指胡不殺賊縛渠魁或則間道還鄉里王師合圍命日
蹙几肉如林草間跪請看守陴豈呼庚終覩焚林不喪匕
荒徼猶平蝸角蠻中區敢鬪槐安蟻長官執訊頭削瓜半
付飢烏半沙水么麼誅鋤非大戮且收害氣埋高壘坤輿

從此祝清甯橫逆應提鼎鐙耳我過清淵風日佳會通河
北絃歌起更無射隼上高墉但有哀鴻煩刺史皇仁掩骼
重涕零鉦鼓聲銷五雲裏

微山曉望

帆影下迴汀湖光帶曉星草荒微子墓樹遠沛公亭鳧掌
牽船穀魚鬚著網腥沮洳雖不惡吾道未飄萍

河邊曉行

客路渾無定河流不肯平隄風乘浪峭海月照沙明地險
何年鑿羈愁一夕生故園千里道空聽鐸鈴聲

酌酒與儲玉琴

當筵那復問悲歡念爾茫茫感百端風雨十年留鐵甕雲
山一夕話銅官誰憐冷鍛嵇康竈我愧虛彈貢禹冠今夜

蓉城好明月醉中猶得坐團圓

寄蕭梅村

問訊淮南蕭使君幾時尊酒賦停雲
秋風鐵篴青絲幃曉月銀鈞白練裙
授食獨容湖海士護儲兼有鸛鵲軍
登壇五十心逾壯不愛尋常祝嘏文

念舊甯無一紙書書成五夜更愁予
吳鄉暑雨連溪稻江縣腥風滿市魚
棠蔭祇今誰翦伐柳條如昔尙扶疏
散人自習稽生懶千里相思淚有餘

潘相字潤章號經峯安鄉人乾隆癸未進士歷官昆陽

知州有轡文書屋集略

董蔗林曰相所著有周易尊翼尙書可解周禮撮要
曲阜志濮志禮志事友錄吾學錄疏球入學見聞錄
轡文書屋集略皆先後呈送四庫館齊楚書局

客有吟袁公安鄴城懷古句者詩以反之

便作詞場看吾猶薄鄴城

袁公句云只作詞場看何人不可傳可能雄後漢

甯許復西京亂瓦朝雲色哀絃夜月聲何如諸葛表忠藎

配阿衡

悼琉球國官生梁允治金型

咄咄兩官生久米名家子生長海天南相隔萬餘里北學
入成均見我哈哈喜如何兩月餘相繼而至此金生積瘵
瘳初見愁難恃梁生敏且強勇欲追前美堆架洛閩書鞭
辟惟近裏手著已等身質問忘移晷暇日多清吟慨忼摩
盛軌更老顧之歡叮嚀細磨砥豈意命俱乖一病長不起
天子卹遠人後先賜恩旨葬之利禪菴厥塋亦修理錫之
養母金高堂供滫瀡兩生素心人存沒總相倚九泉更奚

尤得茲亦幸矣嗟余何所緣挾冊來槐市騎驢六七年有
如萍泛水值生四人來遴師慎擇使相逢喜盍簪意氣諧
商徵誰知歡聚場忽成憂患壘人生天地間合離各有以
況與異國人結契甯漫爾先笑後號咷毋乃太遄駛獨坐
不能眠側聽魂在几歎息遂成詩感念何時止

琉球學郎事

唐榮村外酒那霸港邊梨花際麾倭犬槐陰宿島雞由无
繙舊簡哈立索新題拂拭松雲紙朝鮮未與齊由无哈立
兩儼也球

紙潤
而堅

福山雜吟

山川禹貢記隅夷劉豫更名竟不移好古猶尋羲仲宅多
文久廢李斯碑槎無童女求瑤草戶有耆叻織屨絲莫以

魚鹽卑相業
烝民利賴到今茲

吳森字雲衣南豐人乾隆癸未進士官廣濟知縣有筠

瀾詩草

詩話雲衣詩境清新聖誤去官曾居黃岡和東坡黃
州詩百五十餘首王達心爲繪蘇門侍立圖以識
香之意七律多清婉之句如送人云澆愁酒爲懷人
盡賣賦金因結客輕邯鄲道中云細雨人行毛遂墓
斜陽雁過趙王城伯牙臺云夢裏微聞
沙雁落樽前又見夕陽多韻味自勝

江行望麻姑山

脈脈廣川流
蘭楫從此去
殘雪蘊叢薄
夕陽隱荒戍
麻姑朝未回
仙壇想如故
村莊四五家
衰草門外路
飛瀑界青碧
稠杉緲煙霧
遙企山中人
頗愜山中趣
快然念吾儕
仙風幾時御

東陽作

列巘層層拱四維雪消斜日透林霏寒潮夜向錢塘落估
舶春從海嶠歸沈氏樓邊新燕入羅家宅裏舊人稀惟餘
一片都梁草懷抱馨香鬪菊如

鬱孤臺晚眺

水繞山圍翠幾堆秋清向晚獨登臺試看直北關河壯曾
遣征西壁壘開五嶺塵沙天外落萬家碁枰月中來詩成
我欲憑虛去木客無端勸酒杯

辛卯三月廿四登舟

疏慵真許國涕泣竟辭親落日班聲動沿流翠帶新關山
餘老大面目軼風塵誰立寒潭月狂歌拂釣緡

問月樓

江湖牢落長爲客詩酒清狂復此樓萬古同看山月小

東坡先生集卷之二十一
峯中斷楚天秋文人未必都無賴雪涕何時得暫收沅芷
澧蘭爲誰薦烽煙正在海西頭

謝廣濟篆詠懷

盡瘁已四載不覺心神疲君恩賁勞勩就閒遂初衣霜曉
釋重負卓立當風嘶眷言念疇曩翩翩振羽儀車馬與梧
桐盼睠生光輝恨無淩霄翮青雲難等期茲焉得收身幸
未墮塗泥

諉草蔭北堂芊蔚顏色好負書事遠游書田刈穫早歸來
衣有塵阿母親爲掃一昨羈薄宦乃古夜郎道菽水缺常
供音問亦宵渺傳聞阿母悲倚閭忘昏曉弱息汲井回孤
孫索飯惱復有九男女嬰嬰母懷抱嗟哉行役人投筆太
草草

量移來梅川乃與潯陽鄰潯陽故鄉郡嘉會難重陳白亭
問煙月蕭蕭愁煞人人亦無所忤地亦無所戀鄉書拜使
者拜罷淚如霰寄聲謝高堂莫問胡威絹

皎皎菱花鏡鏡破光故在芄芃幽谷蘭蘭謝香不改我無
烈士腸浮名壯已悔野田非豐收茅檐媿相給倦翮思茂
樹枯肆憶大海諒乏濟時略毋使猿鶴待

齊翀字兩峰婺源人乾隆癸未進士官電白知縣有雨
峯詩鈔

九日登紫陽山頂

秋光矚明遠翹彼紫陽山紫陽絕攀躋巘嶢雲漢間威夷
躡曲徑詰側檜柏環捫蘿傍其隩輪轉隨之灣迢遞高峯
上前後相推扳仰瞻天尺五平看鳥飛還孤雲浮禹閭遠

此日集言目錄卷之二
三
靄鬱仙關下觀喬木杪商飈開芳顏六川逶迤到雙虹揚
回瀾倒影浸城雉萬戶一丸圖登臨寄所思而得開心頑
總計浮生內能知幾日間婆娑嗟日暮歸途興未刪

送程丹谷北上

放懷山月幾晨昏同席雲巖舊里門入世風霜吾輩甚論
交天地布衣存心期五載原無盡話到千秋只自捫君去
江南誰白雪綠蕪丹葦暗消魂

自游汀抵高泉山

策杖尋荒寺清閒我輩偏秋深溪見石晴老樹生煙隈曲
緣山澗高低下麥田行行日已暮明月照前川

清江浦晚泊

落日江城上扁舟萬里情漁燈依浦暗戍鼓隔林鳴客夢

還鄉熟離懷對酒生芒星天四角耿耿夜三更

夢中得句蝴蝶有情春入夢杜鵑無語夜開花因續
成之

綠楊飛絮落誰家芳草年年長碧芽蝴蝶有情春入夢杜
鵑無語夜開花短長續命同心縷深淺盟言繫臂紗閒倚
翠屏人獨立自薰蘭佩待芳華

劉啟秀字懷芳都勻人乾隆癸未進士官玉田知縣有
養園詩藁

游東竺庵

行行水石間曲徑入東竺輕風散朝嵐可以縱遠目閒雲
墮粉白古松凝黛綠盤山云三盤其勢似未足眾水無心
流屈曲同赴谷遠翠若有情霏微落春服桃源異人間霄

漢上樵牧僧徒疏禮數野態儕麋鹿沙雞啄齋堂松鼠穿
佛屋一晌坐雲山三斗撲塵俗忽悟身世間何曾有榮辱
悠悠天地寬吾心自踟促昨日山下人閒愁幾萬斛今日
山中客灑然脫羈束

寄沈誠齋少府

中酒狂歌對賞音平生不改薜蘿襟情多每賦懷人句官
小常存報主心藥餌散完庭悄悄鷺鷥飛下院陰陰此時
無事應思我遠樹微茫江霧深

丁酉七月過新樂縣感懷

官道斜陽驛騎馳道傍茅舍半嗔飢三年試向心頭想幾
事能當去後思河水急於前渡日人情濃是再來時漫勞
父老相迎送慚負吾民應自知

以詩代柬邀魯南莊過話

春色眼中盡春心當奈何禪房清磬罷竹葉雨聲多幽夢
曉初醒前池風自波論詩如有興命駕此時過

李集初名集鳳字繹芻號敬堂秀水人乾隆癸未進士
官鄖縣知縣有願齋集

寄懷朱標謝

尙憶鴛湖櫂楓林得共游如何一樽酒翻作百端憂意氣
親霜劍飄零逐水鷗至今涼月上夢斷荻花洲

魯鴻字遠懷號厚畬江西新城人乾隆癸未進士官孟
縣知縣有厚畬詩藁

題似山五雲山房

竹徑高臺出層軒四面開千秋亭上酒五月笛中梅遠水

環山盡晴雲帶雨來蒼茫煙柳積瑣屑亂莓苔
步屨春風裏閒花到處香輕雲過水涇殘月下山涼路失
遺樵辨林深古寺藏扶筇能濟勝潘岳鬢毛蒼

張世法字平度號鶴泉湘潭人乾隆癸未進士官甘肅
華亭知縣有瞻麓堂集

宿長流水

長流流不斷砂磧馬蹏窮草入春猶沒山經雨亦童求音
無鳥到問徑罕人同薄暮停車處荒煙一縷中

平涼旅夜漫成

最是秋天不肯明蕭蕭白髮已潛生人間日豈回三舍杭
上愁將到六更截業崆峒誰訪道潺湲隴水舊聞聲自嗟
身事俱遲暮何復羈棲臥古城

張熙純字策時號少華上海人乾隆壬午舉人乙酉召試授內閣中書有華海堂集

寒山別館對雨同來殷作

際曉天蟬吟涼雲蔭喬木玉琴泛商聲寥寥感舊獨故人
軫離居暇日惠高躅煙蘿結清歡嵐影散遐矚飛雨忽來
過筠翠靄新沐稍迷雲外峯復亂林中瀑頗滌塵慮煩焉
念流景速嘉藻時見遺瑤尊更相屬松陰淡欲暝殘鐘度
空谷

傅玉書字素餘夔安人乾隆乙酉舉人官安福知縣有竹莊詩草

題福泉山張三丰手書遺蹟

黔中萬山爭恢奇福泉遠在山城陴當年邊郡始開創高

邱大壑藏蛟虬仙人想亦避世網跨江越楚來荒陲相傳
結茅夜禮斗星精照爛如朝曦乾坤曠蕩供嘯傲風雨舛
誤恣鞭笞詔書數下不可致守土敦請徒爾爲道成跨鶴
去不返追慕神異諛以辭字端行密備梗概簡閱工匠深
磨治諏辰立石詫奇事碑陰髣髴蟠龍螭神仙指畫勝剗
剔苔侵雨蝕無雕虧至今屈指三百載濡墨脫紙猶淋漓
岫巘石鼓尙莫識瑤函寶笈誠難窺要之幽遠存勿論思
議穿鑿差羣迷儒生論世識大體孤竹清節傳口碑永樂
改元受符籙張侯勳亦銘鼎彝不臣不友遂高尙落落干
古知者誰我朝昇平洽文治山陬僻壤成交衢欲起仙人
叩遺蹟煙霞黯淡空山祠

白鹿洞謁朱子祠

洙泗非不作鄒澤豈好辨帝王集其成揚墨害當殄茫茫
漢唐墜汲汲周程衍心源則已傳經義未盡闡皇哉考亭
子負荷萬世鮮卓識出困知定力生實踐說書抉閭奧刪
史嚴斧冕宛然起先聖而質訂訛舛記誦譏雜揉詞章病
蕪淺況乃異端蔽忍使滋興忽赤日懸中天纖翳長風卷
照彼魑魅徒情狀露愧覩象山固同志過高良未免觀其
講義利首肯意甯偏所患流弊深不敢惜謦謦何爲煩吾
儕調停增總繼當年屢召對乾坤佇旋轉致主隆唐虞入
告悉訓典一時雖坎壈千秋載昭顯至今絃誦堂猶重師
儒選廟祀等膠庠天章煥楣扁至教欽明誠微悰策敦勉
彭蠡極天流廬阜截雲巘海岱遲大觀對此神已緬

東林寺

遠公有淨社歷世風未歇雖與吾道殊要爲彼人傑當年
遺民徒各能保其節豈不溺梵理藉以謝塵紕惜哉種蓮
人心雜乃見絕何如菊籬翁一醉洗禪悅

于忠肅公祠墓

懷來城北煙塵昏十年武備徒紛奔天子以國徇闡寺旦
夕勢欲無中原此時一木支大廈舉朝無人一司馬國有
君矣君自歸議和議遷何爲者璽書旣通戰屢捷奇貨空
居失所挾假令襁褓遽承祧不宋高宗卽衛輒野狐南來
盤石固降勅自避賢者路上羞宗廟下臣民高揖南宮豈
云錮前星不耀帝星移祀有主者非君誰小臣貪功事僥
倖嚮也沙漠今宮帷奪門金印大如斗不死麒麟吹羣狗
危身誤國君不恤殺一忠臣辨何有衣冠東市無驚惶以

奠鼎鬯陳高皇至今空山拜祠墓英風赤日昭穹蒼

仲秋同人擬補韓昌黎登華嶽詩卽用韓衡山詩韻

臣承帝命佐相公乘驄司馬行師中天威遙奪魑魅魄敵

愾爭效貔虎雄塗經華嶽縱輕策萬八千丈誠難窮此時

清霽值秋半

按公華嶽題名元和十二年八月也

巨掌岌業生高風意象慘

淡愼語笑真覺呼吸青具通白雲丹霞起足下繡苔石室

嵌晴空天臺勢拄玉宇正蓮華光抱朱曦融省方西極帝

所駐嶽靈守護非其宮真泉玉盆混虛碧瑤芝琪樹紛糝

紅采芝酌泉食且飲芳香精白生子衷俯仰六合但直視

憑弔萬世慚藐躬古稱登岱小天下孔子旣沒無敢同自

顧不在弟子列斯文未喪責未終卽如此行廟算定雅頌

待紀神聖功題詩未畢日將入洪河落處煙冥濛照我蒼

顏立華頂揮灑爽氣橫關東

李衍孫字蕃升號味初惠民人乾隆乙酉舉人官沔縣知縣有炊菰亭詩集

黃河五隄詠

遙隄

憑處亙地軸蜿蜒甯計里何處魚鱗屋
厖覺鼇背起願鞏千百年黃流不到此
去河遠築以備大漲曰遙隄

縷隄

黃河易停沙恃此一束力東注建瓴勢犀利
劃南北敬告陽侯鄉勿謂太相逼
逼河流曰縷隄

夾隄

截流擬當關扼要見控制夾輔相與長脣齒
得其勢天矯

雙游龍攫爪入雲際

地當水之衝慮縷隄不保復作一隄於內以防未然日夾隄

月隄

夾隄與縷隄直趨無支蔓有時善因依一曲作銅堰月蹙

修眉長渾睹湘妃怨

夾隄有不能綿互規而附於縷隄之內形若月之半日月隄

格隄

誰齋千金壁怒蛟挾船走奔駭雨隄間疑聽颶風吼移來

夸娥山早塞瞿塘口

夾隄與縷隄相比而長縷隄偶潰奔濤駭浪將長驅兩隄之間而不可遏

故又築一隄橫阻於中曰格隄一名橫隄

趙帥字元一號偉堂涇縣人乾隆乙酉舉人官安肅知

縣有偉堂詩鈔

詩話偉堂為隨園弟子詩清辭雋旨圓轉如意隨園謂偉堂與毛侯園朱竹江為三鼎足蓋皆與隨園沆瀣一氣者也

宛陵雜詩

估帆葉葉泊雙橋
綠柳青帘檻外飄
隔岸人家歌水調
江樓向晚雨瀟瀟

聞道龍沙卷雪飛
蠻中傳去織弓衣
柏山寺畔吟魂在
曾見林梢鴨腳肥

梅都官墓下

春煙裊裊將軍樹
碧草萋萋丞相祠
殘月曉風嗁杜宇
水亭略約立移時

青山晚泊同曉溪雲澗拈得微韻

倒捲長江白浪飛
幽巖鐘磬靜禪扉
秋風極浦雁初下
暮雨空山僧未歸
漢上估樵千樹密
洲前漁火一星微
與君更約齊安過
載酒題詩赤壁磯

舟中作

春風麥浪已盈隄柳外昏鴉帶月棲夜半忽聞湍水響扁舟知在練湖西

登金壇城望茅山

閒上孤城眺遠郊雲端翠巘列三茅昨宵夢入華陽洞白月松間照鶴巢

吳錫麟字上麒號竹泉嘉興人乾隆乙酉舉人官遂安教諭改廣東鹽大使有自怡集嶺南詩鈔

詩話竹泉爲遂安校官十五年覺羅制府吉慶撫浙以竹泉善爲章奏頗賞之及督兩粵遂招入幕因改鹽筴官與俱往制府坐事爲同官所讎自裁竹泉作輓詩曰四月軍營侍崇朝凶問驚主恩寬後效臣節誓無生闕外將軍令空中甲馬聲斯民留直道巷歌淚縱橫制府久持疆節以猶介自持汲修主人亟稱廉其

黃山雲海歌

黃山山頂三十六芙蓉芙蓉削出波溶溶但見白波渺瀰
巖竇起不聞窾坎鏗鞳鳴洪鐘匹練輕舒散復聚瞬息回
頭失林塢漸湧懸崖百丈濤蒼茫一氣涵天宇就中尤愛
天都高忽驚蜃氣迷峴嶂卷舒變黼本無迹噓吸直欲浮
鯨鼈軒轅容成不可遇種松老訝龍鱗露願跨長空博望
槎高歌南浦雲流句

涿州

北地多喬野繁華數此鄉雄心憐督亢佳氣出樓桑日下
黃圖盛雲邊紫塞長莫誇黃帝戰逸事任荒唐

羅有高字臺山瑞金人乾隆乙酉舉人有尊聞居士集

詩話臺山才分絕人幽憂學佛與汪大紳彭尺木深契皆能通儒釋之奧存詩雖不多導源漢魏根本性情其意味甚深厚

夢中登翠微山得句

堀徑絕猿引，敲峯倚天赤。中有辟世人，鄰聚談古易。春晴放雞豚，爛漫桃花磧。雪意玉寒松，冪峭穿壁立。以此閱世運，蒙蘿深寂歷。夜靜聞古琴，起步月皓白。漉哉化城游，酣嬉醉空碧。下界嘑秋蟲，俛仰一太息。

贈季弟鼎臣

浮生劇風波，中年憂樂半。純素污所緣，高明鬼斯覲。三人成市虎，冒昧離禍患。立志苟不欺，可使金石貫荆山。剖奇珍，精神朗，層漢邁出火宅中。香光近逾爛，孟子道性善，大禹陳洪範，彝倫矩自天。怪變誰能亂，但期保耿耿，白髮娛歲宴。

訪梅樓上月，往時共深夜。吾季年少小，語芒已激射。懸鐙

聽雞鳴留戀難就舍乖離雖日深此意尙如乍萬事東流水一
一成悲吒俯仰抱幽獨茹荼若啖蔗昔年病燕雲讖語雜嗟訝
兄弟終在口鄰死心不化載誦小宛詩淚比源泉瀉

贈潘守愚思質昆弟

逝水不可極大儀無停轉悠悠三十年微抱未遑展前聖
去我久積疑並嶮嶮安得中山飲醉冥羅衆善

中散負青霞思王歎飛蓬平子利蜚遞班椽賦幽通古之
賢達者一笑大鴻濛所志多不踐萬古悲回風

太息南郭人三悲而日遠端著得潛龍空林安靜偃行義
會有適早計怨歲晚咄哉殷深源名浮坐自蹇

兩潘東西陸駿健睨高寒心懸白日照手隘青雲攀長嘯

沮溺津捷步燕然山霜蹠故空闊自問何能閒
結交樂听暮語默論深契午夜供清茶微言屑風桂妙處
輒粲然縱脫無根蒂仰首望青霄莫遣浮陰蔽
讀書苦未多據德苦未堅涼涼取道遠骨肉愁南天馳驅
愧濩落西食安清便昔訓日周復甯令本志遷

過繭雲廬名之曰方寸蓬萊作文記之更題詩其後
刻意探幽人海外精廬誰愛石塘偏山攢澗綠環空界室
倣低垣受遠天遯迹便同冀缺釋移情虛寄子春弦嘉名
肇錫休相訝一記精微證水仙

劉應陞字覲宸號胎簪信陽人乾隆乙酉舉人有胎簪

山房詩彙

詩話覲宸詩專學其州先進何大復心摹手追可謂
形神俱似惟七言律有大復之明秀無大復之高渾

較諸體爲遜其論文有云氣者文之輔骨者文之主
故采也而素先之水也而風行之先之者骨行之者
氣是以骨振者其言閑而肆氣醇者
其旨清以遠論藝有精識多類此

首春南園作

初景覽澄霽芳林靄餘清連峯抗高館曲流帶層城下帷
志安逮灌園力交營綠水春始波紫驛路漸榮潛蚪奮陰
壑時禽變春聲懷新恐節逝進德戒處盈邱樊守虛寂素
履慙幽貞蘭皋信延佇觴詠陶孤情謝生感飛鴻楚客吟
芳蘅物候足可娛偃仰依紫荆

樂寅還西山後雨彌日寄憶

昨從澗西寺君返山南宅微雨湖上來楚雲萬重碧丁丁
伐木響悠悠山坡隔世故紛糾纏遠憶聯牀夕

次淮上寄樂寅

朝發朗陵途羈心杪秋積北風吹五兩淮流澹將夕明霞
上遠水寒樹帶行客故人望何處西南幾峯碧

游西山卻憶貧首書舍次樂寅韻

五日遵折坂目極蒼雲間其陽類盤谷其陰若商顏蜿蜒
各異狀登陟阻且艱木末懸匹練萬仞流淙潺游魚澹相
樂注視神爲閒石瀨成夕宿鐵嶂行晨攀飛梁峙雙表下
若橫重關誰張屏九疊爛如古錦斑遠夢鏡湖月媼娥陂
上山東風草微綠谷口花成殷須記嵩陽下應待行雲還
首春賢首寺留別

山寒澹成煙溪午游氣重杳杳蒼翠間樵蘇殊未逢巖棲
緬微尙寄此泉石蹤我昔往從之三載巢雲松憂樂趨豈
殊出處理亦同謝彼招隱人卻愛青芙蓉桂樹山之幽童

童開春冬蒼然谿谷深暝色來西峯

由靈山赴丹谷

幽壑忽復啟升雲瞰羣峯懸磴縈細縷噴泉曳危春居人
背三阪礪道激流淙青荔旣覆屋紅槿亦列墉澗沿乏虛
泛陵緬恣幽蹤豈伊慕樵隱聊此游天慵獨往意忘歸日
暮采紫茸

聞樂寅近同筠亭游響水寺

衆山肇桐柏淮淝兩經絡雖復深箐中蕩然出林壑雲麾
舊時蹤陵谷久索寞仲蔚蓬蒿人紅顏任棲託花竹通阡
術紫荊羅鳥雀側聞西山游藜杖遠探索角巾亦嘉侶眷
焉劇靈藥是時春雨餘石磴競紅萼名藍匝青翠雲水氣
參錯湍激自殊響奔崩怒相搏鞢鞞無停奏洞漩倏連躍

始信山水音清冷發天樂遙瞻窮躋攀長吟振層巒蘿帶
分婉變招攜悵茲約想當舊雨佳枉爾碧雲作

游滴水崖歌

芙蓉九疊張翠屏鐵色四列浮空冥雙泉激射作雲氣空
濛忽散層崖青須臾隨風遠漫滅飛流皚皚千尺雪五丁
力鑿丹嶂開雙童旄倚青壁裂訇然石扇憑蛟宮洞中日
日生雷風我來仲春氣始霽數子藤竹來相同紅泉碧樹
兩幽絕千載令人懷謝公

夜酌與樂寅

君今胡爲在幽谷讀書等身花滿屋天寒日暮谿壑深騎
馬入城就我宿人生三十眞壯年況君才藻尤翩翩歲拾
橡栗豈人意時逢泉石多貧緣羣山壓城雲氣溼殘燈對

坐寒雨急秋井青苔何處無空山白壁誰人泣我歌偏仄
君莫悲男兒飛伏會有時不如且盡杯中醪勿使雞鳴庭
樹枝

山中久雨鄰人招飲比夜復還所居

東山五日行復宿溪上秋風破茅屋野人更邀西澗行騎
馬沿緣穿水竹平田秔稻臨柴門秋蛩向夕鳴籬根殘鐙
酌罷卧山牖一夜風雨孤村昏空林颯颯高霧溼四山無
人溪水急鄰家酒熟呼我嘗冒險衝泥下廣隰秋天漠漠
雨如織歸向前村正昏黑牀沾屋漏不得眠窮谷深山感
何極男兒悠悠江海人胡爲久卧山中身明朝雨晴驅馬
去回首雲磴空嶙峋

小寒食西村作卻憶秀兄

寒食孤村路微風野岸花行吟望春水夜雨宿山家雲氣
浮高樹灘聲落遠沙相思芳草外回首卽天涯

納涼憶李耘書

晚涼乘水榭疏雨過高城松月夜初上池花香暗生樓臺
橫漢影砧杵起秋聲忽憶梁園客淒淒此夕情

寺夜詠松風

習靜西巖寺松風到枕幽四山皆作雨一夜忽成秋梵響
有時續泉聲何處流分明廬岳奏謖謖坐間收

武陟道中

驅車古原上旅食就荒村山勢尊王屋河流拓孟門離心
驚草碧倦眼畏塵昏寂寞韓陵石何由共一言

登賢山絕頂

懸崖秋至始躋攀
縹緲龍宮積翠間
孤嶂白雲隨客到
六時清磬對僧閒
南朝故壘依寒草
落日荒城帶楚山
惆悵花林獨歸去
洞門流水送潺湲

許州訪歐公西湖不得

叢祠漠漠水煙空
好景當年付醉翁
莫向荒蕪歌水調
更無人泊藕花風

田棨庭字汝戟號鶴汀建水人乾隆乙酉舉人

發蒼溪

十日巴東雨山城
見夕陽墟煙圍淺碧
沙岸界深黃夢斷
關河迴天寒棘道長
招舟迷晚渡鐙火間
漁莊

萬鍾傑字汝興號荔村昆明人乾隆乙酉拔貢由知縣
歷官福建按察使

黃牛峽有懷錢南園太史

人世能經幾白頭，輕帆今又下黃牛。
猿聲嘒過三湘雨，楓葉吹殘大別秋。
信有文章光上國，那堪風月坐南樓。
十年同作天涯客，猶是空江不繫舟。

姚念曾字友硯金山人，乾隆乙酉拔貢，官應山知縣，有賜墨齋詩。

開元寺題壁用杜樊川題開元水閣，許丁卯寓開元精舍韻。

花墮珠林空復空，湛然惟有一鐙同。
天晴獨鶴歸霞外，秋老層巒出鏡中。
金鼎煙銷晨滴露，石樓塵滿夜號風。
六朝興廢餘彈指，坐對雙溪水自東。

生涯潦倒信浮沈，已絕名言祇樹林。
淨界月皴松影細，荒

臺雨漬蘚痕深愁中看雁能無淚客裏聞雞尙有心欲問
遺芳尋斷碣候蟲切切和孤吟

朱黼字大米號畫亭江陰人乾隆乙酉拔貢官蘆山知

縣有畫亭集

李中耆曰畫亭初官流陽校官以薦舉銓授蘆山令
晚僑居流陽年九十四乃卒所爲詩沈酣溫雅宗法
唐人入蜀諸篇傑
鼻鬱蟠是其最盛

短歌

君不見成安君泝水之上身首分君不見管敬仲貧賤之
交腹心共古道可慕今人隳翻雲覆雨羞者誰種樹莫種
白楊柳酌酒莫酌黃金壘楊柳不向雪中舞金壘但向豪
門舉

虞姬祠

高樓飛閣開雲霞明璫翠羽顏如花夫君霸業在本紀獨
少外戚留世家英雄青史不堪說美人黃土猶爭惜何曾
垓下葬芳魂空有霜鋒汚頸血兵戈轉戰生死同美人卽
是真英雄咄哉孺子劉沛公戚姬乃以人姁終傳聞飛霍
從空起靈爽猶能衛桑梓可惜重瞳下相來暗鳴叱咤徒
爲耳

長門怨

桂殿金鋪暗椒房玉漏沈猶聞仙樂奏空對月華臨進御
原非貌思君獨此心宮中謠詠易不敢動悲吟

蜀中秋柳和李滄雲學使

蕭蕭聽落葉嫋嫋望遙汀暮景猶長路秋風只故亭已衰
眉未白相見眼終青鐵索江橋畔攀條濁酒停

函谷關

飛樓高壓亂峯西天險嵯峨不可躋裂土自憑三尺劍封
關誰仗一丸泥黃河北走聲偏壯紫氣東來望欲迷我學
終童棄繻久那堪霜鬢送輪蹄

奉寄憺園先生

三年京國渺愁余不向南州問起居白髮尙留豪興在青
山應笑故人疏消磨晚景能忘酒料理虛名好著書我亦
倦游期息駕與君江上樂樵漁

秦淮雜詠

萋萋野草帶斜暉江左風流事總非燕子不歸門巷改行
人還說舊烏衣

宋鳴謙字敬軒萊陽人乾隆乙酉拔貢官長清教諭

詩話敬軒爲荔裳四世孫與其兄聲鸞鳴和皆有詩入山左詩續鈔錄之以見詩書之澤遠也
病後偶成

強起梳頭不自持
茫茫心跡復誰知
病中作客偏懷楚
夢裏還家易別離
十載青鐙官舍冷
一林黃葉雁書遲
麴生蘊藉真吾友
與爾綢繆結靜期

樂三省字曾約號一峯金溪人乾隆乙酉拔貢官貴溪訓導有趣園詩集

平山堂作

道是淮東第一觀
名賢勝迹且盤桓
便同峴首思羊祜
長擬東山屬謝安
霞曳斷紅藏碧水
風搖新綠上雕闌
隔江金粉知何似
今日登樓著意看

劉士璋字南赤江陵人乾隆乙酉拔貢有三湖漁人集

荊門別王峻封

下馬郵亭飲君酒君醉不辭酌以斗故人情篤重分手並
行共宿三旬同長途渺渺隨秋風河梁一賦嗟西東人生
聚散豈非數他日相逢定何處我返自崖君且去

晚次安鄉縣

西風搖落雁行分向晚移舟酒半醺水護縣樓秋柝出林
藏古寺暮鐘聞來朝便鼓湘江柁何日踏開衡岳雲欲向
重湖看明月洞庭木葉落紛紛

劉豹字蔚子湖南鳳凰人乾隆乙酉拔貢

游小酉洞

朔風颯颯舞苔衣捫葛攀蘿上翠微千載人真疑魯壁半
山我自叩秦扉屏開青嶂江頭立溪擁寒雲足下飛歎息

鑿楹空飽蠹祕書偏欲覓靈威

賈炎字午橋故城人乾隆乙酉拔貢

春暮野行

平生嗜幽意乘暇到邱原
旭日明鴉背流泉響樹根
隴晴添絮影春老斷花魂
抱甕誰家子青蓑自灌園
欸乃聲何處行知近逝川
歸禽赴斜照孤棹破溪煙
老衲扶筇去村漁曬網眠
何當調桂餌垂釣晚風前

晚晴移詩匯卷九十二終